



INFORME DA SECRETARÍA XERAL DA PRESIDENCIA SOBRE O PROXECTO DE DECRETO POLO QUE SE REGULA A COMPOSICIÓN E FUNCIONAMENTO DA COMISIÓN GALEGA DE PREVENCIÓN E REPRESIÓN DA DOPAXE

En cumprimento do disposto no artigos 40.4 e 43.2 da Lei 16/2010, do 17 de decembro, de organización e funcionamento da Administración xeral e do sector público autonómico de Galicia, respecto do *proxecto de decreto polo que se regula a composición e funcionamento da Comisión galega de prevención e represión da dopaxe*, esta Secretaría Xeral emite o preceptivo

INFORME

1.- Marco normativo

O Estatuto de autonomía de Galicia aprobado pola Lei orgánica 1/1981, do 6 de abril, no seu artigo 27.22, atribúe á Comunidade Autónoma de Galicia a competencia exclusiva en materia da promoción do deporte e axeitada utilización do ocio.

Ao abeiro desta competencia aprobouse a Lei 3/2012, do 2 de abril, do deporte en Galicia, que ten por obxecto a promoción e a coordinación do deporte na Comunidade Autónoma de Galicia, así como a ordenación do seu réxime xurídico e a súa organización institucional, de acordo coas competencias que o Estatuto de autonomía e o resto do ordenamento xurídico lle atribúen á Comunidade Autónoma de Galicia. A devandita norma recolle no artigo 5, entre as competencias da Administración autonómica, a de “establecer unha política activa de protección da saúde do deportista, de loita contra a dopaxe no deporte e de re transmisión e represión das conductas violentas ou contrarias á boa orde social”.

O Título VIII da Lei 3/2012, do 2 de abril, regula a actuación autonómica en materia de prevención e loita contra a dopaxe no deporte, e no seu artigo 130 configura a Comisión Galega de Prevención e Represión da Dopaxe, como un órgano administrativo, adscrito ao órgano autonómico competente en materia deportiva, ao que se lle atribúen as competencias en materia de defensa da saúde do deportista e de prevención e control da dopaxe no ámbito da Comunidade Autónoma, establecéndose nese mesmo artigo as súas funcións. Así mesmo, o citado artigo remite a un ulterior desenvolvemento regulamentario a composición e funcionamento da dita comisión.





A nivel estatal ditouse a Lei Orgánica 3/2013, do 20 de xuño, de protección da saúde do deportista e loita contra a dopaxe na actividade deportiva. Co fin de incorporar as modificacións necesarias para a súa adaptación ás modificacións introducidas no Código Mundial Antidopaxe, que entrou en vigor o 1 de xaneiro de 2015, ditouse o Real Decreto Lei 3/2017, do 17 de febreiro, polo que se modifica a Lei Orgánica 3/2013, do 20 de xuño, de protección da saúde do deportista e loita contra a dopaxe na actividade deportiva.

Recoñécese na antedita Lei Orgánica 3/2013, do 20 de xuño, a existencia de competencias autonómicas en materia de loita contra a dopaxe dos deportistas con licencia deportiva de ámbito autonómico ou en competicións de competencia autonómica, establecéndose que, en todo caso, a formulación das súas políticas debe realizarse no marco dos compromisos internacionais asumidos por España e nos tratados e convenios que sexan de aplicación en España.

A nivel internacional, a Convención Internacional contra a Dopaxe no Deporte (BOE 16 de febreiro de 2007) establece o compromiso de respectar o Código Mundial Antidopaxe, elaborado pola Axencia Mundial Antidopaxe, cuxa última versión actualizada entrou en vigor o 1 de xaneiro de 2015.

2. Necesidade, acerto e oportunidade

Respectando o marco normativo, a regulación prevista neste proxecto responde á necesidade de desenvolver regulamentariamente o a composición e funcionamento da *Comisión galega de prevención e represión da dopaxe*, á que lle corresponden as funcións establecidas no Título VIII da Lei 3/2012, do 2 de abril.

3.- Contido

O proxecto decreto estrutúrase en dous capítulos, cun total de 20 artigos, dúas disposicións adicionais, unha disposición derogatoria única e dúas disposicións derradeiras.

No capítulo I establécense o obxecto e a natureza desta comisión.

O capítulo II establece que corresponden á Comisión Galega de Prevención e Represión da Dopaxe as funcións previstas na Lei 3/2012, do 2 de abril, regula a súa composición, o nomeamento, o cesamento e a renuncia das persoas membros, a duración do mandato destas e os seus dereitos e obrigas. Ademais prevese a posible participación de persoas asesoras expertas nas sesións da comisión, con voz e sen voto, e se regula o réxime de funcionamento do órgano.





As disposicións adicionais regulan as axudas de custo que correspondan ás persoas membros da Comisión Galega de Prevención e Represión da Dopaxe que non teñan a condición de persoal ao servizo da Administración autonómica e dispónse un prazo máximo de seis meses desde a entrada en vigor do decreto para a celebración da sesión constitutiva da comisión. A disposición derogatoria contempla a derogación das normas que resultan afectadas por esta norma e as disposicións derradeiras regulan a facultade de desenvolvemento da norma e a súa entrada en vigor.

4.- Tramitación e procedemento

A tramitación do proxecto realizouse de conformidade co establecido no Título II da Lei 16/2010, do 17 de decembro, de organización e funcionamento da Administración xeral e do sector público autonómico de Galicia.

Consta no expediente a documentación xustificativa dos seguintes trámites:

- Certificado trámite consulta pública previa 10/11/2017
- Acordo de inicio do 27/11/2017
- Memoria xustificativa do 27/11/2017
- Memoria económica - financeira do 27/11/2017 e informes complementarios do 14/02/2018 e 11/05/2018
- Táboa de vixencias do 27/11/2017
- Informe do Servizo de Apoio Técnico, do 11/12/2017
- Aprobación inicial do 11/12/2017
- Comunicación trámite audiencia ás federeacións deportivas galegas e a organización colexiais, o 11/12/2017
- Alegacións recibidas Ilustre Colexio Oficial de Médicos da Coruña, Colexio Oficial de Enfermería de Pontevedra
- Informe Agencia Española de Protección de la Salud en el Deporte (AESPAD), do 08/02/2018
- Informe da Secretaría Xeral da Igualdade, do 26/02/2018
- Informe da Dirección Xeral de Planificación e Orzamentos, do 20/02/2018 e novo informe do 14/05/2018
- Informe Dirección Xeral de Avaliación e Reforma Administrativa, do 02/03/2018 e novo informe do 21/05/2018
- Certificado publicación Portal de Transparencia e Goberno Aberto, do 07/03/2018.
- Informe da Asesoría Xurídica, do 07/05/2018





- Memoria xustificativa da Secretaría Xeral para o Deporte do tratamento dado ás alegacións recibidas e ás consideracións dos informes recadados, do 22/05/2018

En virtude do exposto, emítese o presente informe de conformidade cos artigos 40.4 e 43.2 da Lei 16/2010, do 17 de decembro, e procede solicitar o ditame do Consello Consultivo de Galicia, segundo do disposto no artigo 12.c) da Lei 3/2014, do 24 de abril, do Consello Consultivo de Galicia.

Santiago de Compostela

O Secretario Xeral da Presidencia

Manuel Galdo Pérez

